

## STEPHENS, THOMAS (Casnodyn, Gwrnerth, Caradawg; 1821-1875), hanesydd a diwygiwr cymdeithasol

PDF Generated on: Fri, 04 Oct 2024 20:06:25 +0000

<https://bywgraffiadur.cymru/article/c11-STEP-THO-1821>

**Enw:** Thomas Stephens

**Ffugenw:** Casnodyn, Gwrnerth, Caradawg

**Dyddiad geni:** 1821

**Dyddiad marw:** 1875

**Priod:** Margaret Elizabeth Stephens (née Davies)

**Rhiant:** Rachel Stephens (née Williams)

**Rhiant:** Evan Stephens

**Rhyw:** Gwryw

**Galwedigaeth:** hanesydd a diwygiwr cymdeithasol

**Maes gweithgaredd:** Hanes a Diwylliant; Llenyddiaeth ac Ysgrifennu; Gwasanaethau Cyhoeddus a Chymdeithasol, Gweinyddiaeth Sifil

**Awdur:** Marion Löffler

Ganwyd Thomas Stephens ar 21 Ebrill 1821 yn Tan-y-gyrchen (a elwid hefyd yn Tŷ-to-cam) ym Mhontneddfechan, Sir Forgannwg, yn fab i'r crydd adnabyddus Evan Stephens a'i wraig Rachel, merch William Williams (Wil y Gweydd, 1778-1834), gwehydd a gweinidog capel Undodaidd Blaen-gwrach. Ymhlith y bobl a ddylanwadodd arno yn ei blentynod oedd **Maria Jane Williams** (Llinos) a'r Crynwr Thomas Redwood (awdur *The Vale of Glamorgan. Scenes and Tales among the Welsh*). Wedi mynychu ysgol elfennol a gynhaliwyd mewn ysgubor ger Cefn Rhigos, treuliodd tua thair blynedd yn yr ysgol Undodaidd yng Nghastellnedd a sefydlasid yn wreiddiol gan **David Davis** (1745-1827) ac a oedd dan ofal John Davies, cyn-weinidog Capelygroes yng Ngheredigion, yn ystod ei amser yno. Ym mis Hydref 1835, fe'i prentisiwyd i David Morgan, fferyllydd ym Merthyr Tudful. Pan fu farw Morgan ym 1841, cymerodd drosodd y busnes yn 113 High Street, a hwn oedd prif ffynhonnell incwm y teulu drwy gydol bywyd Stephens. Ym 1866, priododd Margaret Elizabeth Davies, disgynnydd i deulu Undodaidd adnabyddus Williams, Penrheolgerig (gweler **Morgan Williams**, 1808-1883), yn eglwys plwyf Llangollen. Ei brawd Richard a ofalodd am y rhan fwyaf o'r busnes wedi i Stephens ddioddef ei strôc cyntaf ym 1868.

Dylanwadodd Thomas Stephens ar hanes y Gymru fodern drwy ei ymdrechion fel aelod o ddosbarth canol Merthyr Tudful i droi safle diwydiannol di-drefn yn gymuned drefol â chyfleusterau sifig modern; drwy ei waith dygn er moderneiddio pob agwedd o fywyd a diwylliant Cymru, yn enwedig addysg, yr eisteddfod ac orgraff y Gymraeg; a thrwy ei gyfraniadau arloesol i ysgolheictod Cymreig ym maes hanes.

Fel Undodwr, credai Thomas Stephens yng nghydraddoldeb pawb o flaen Duw, ac yng ngallu dyn a chymdeithas i gyrraedd cyflwr uwch drwy addysg a thrwy ddilyn gweithgareddau hamdden rhesymol. Mae'n rhaid ystyried ei gyfraniad cyfan yn erbyn y cefndir crefyddol hwn. Gweithredodd ar sail ei gredoau yn gyntaf drwy gyd-sefydlu lyfrgell gyhoeddus ym Merthyr Tudful ym 1846, y bu'n ysgrifennydd iddi nes i'w iechyd fethu ym 1870, gan drefnu a thraddodi nifer o ddarlithoedd addysgiadol. Derbyniodd nawdd a chefnogaeth yn y prosiect hwn, fel i brosiectau eraill, gan yr **Arglwyddes Charlotte Guest** a **Syr John Josiah Guest**. Ymgyrchodd dros Fwrdd Iechyd i Ferthyr Tudful yn y 1850au, cymerodd rôl blaenllaw yn y proses o gynllunio Neuadd Llwyrymwrthodol i fod yn gartre i weithgareddau hamdden adeiladol i'r dosbarthiadau gweithiol, a gweithiodd yn ddi-fflino dros Ymgorffori'r dref. Gweithredodd fel cymedrolwr rhwng yr haearnfeistri a'r gweithwyr fwy nag unwaith. Ym 1853, ef a gadeiriodd gyfarfod a fynychwyd gan dros 3,000 o bobl i ddwyn i ben streic hir. Casglodd a dosbarthodd arian hyd ddiwrnod cyn ei farwolaeth ar gyfer gweddwon a phlant y dynion a laddwyd mewn ffrwydrad ym Mhwl Glo Crawshay Gethin Rhif 2 ym 1862. Bu'n gyfaill agos i **H. A. Bruce**, Arglwydd Aberdâr, ac yn ymgyrchydd brwd ar ei ran fel yr AS Rhyddfrydol dros y dref o 1852 hyd 1868. Gwasanaethodd fel Uwch-Gonstabl Merthyr Tudful ym 1858.

Daeth dawn ac arddull Stephens fel diwygiwr cymdeithasol i'r amlwg yn gyntaf mewn cyfres o lythrau i'r papur newydd *The Cambrian* ym 1842-3, pan feirniadodd natur ramantus eisteddfodau'r cyfnod yn hallt. Ym 1847, ac mewn ymateb i gyhoeddi'r *Llyfrau Gleision*, cymerodd ran flaenllaw mewn dadl ar dudalennau'r *Monmouthshire Merlin* ynghylch darpariaeth addysg. Stephens oedd un o'r ychydig rai a leisiodd y farn amhoblogaidd fod ymdrechion gwirfoddol yn annigonol ac y dylai'r wladwriaeth ddarparu addysg i'r nifer fawr o blant nad oeddynt yn mynychu ysgolion ar y pryd. Lladdwyd arno, gan ei alw'n 'maniac' ac yn 'gelwyddgi' gan gynrychiolwyr capel ac Eglwys am yr agwedd arloesol hon.

Thomas Stephens oedd un o ddau ymgyrchydd blaenllaw dros ddiwygio orgraff y Gymraeg, pwnc a drafodwyd ers ymdrechion cyfeiliornus **William Owen Pughe**. Yn dilyn cyfarfod yn Eisteddfod Llangollen 1858, cylchredwyd holiaduron gan Stephens a **Robert John Pryse** (Gweirydd ap Rhys) a arweiniodd at gyhoeddi *Orgraph yr Iaith Gymraeg* ym 1859, rhagflaenydd gwerthfawr i'r ysgrifau a gyhoeddwyd gan **Syr John Morris-Jones** yn *Y Geninen* yn y 1890au, ac i'r gwaith safonol ar egwyddorion orgraff y Gymraeg a ymddangosodd ym 1929.

Cynigiai cystadlaethau eisteddfodol gymhelliaid a llwyfan pwysig i ddysg a chreadigrwydd ysgolheigion lley Cymru Oes Fictoria, ac nid oedd Thomas Stephens yn eithriad yn hyn o beth. Enillodd wobrau yn y rhan fwyaf o'r eisteddfodau y cystadlodd ynddynt rhwng 1840 a 1858, weithiau hyd at dair gwobr. Dathlodd ei fuddugoliaeth gyntaf yn Eisteddfod Lerpwl ym 1840 gyda'r traethawd ar 'History of the life and times of Iestyn ab Gwrgant, the last native Lord of Glamorgan'. Sefydlodd ei hun fel ysgolhaig mwyaf arloesol y cyfnod gyda'r traethawd 'The Literature of Wales during the twelfth and succeeding centuries', a enillodd wobwr Eisteddfod Cymreigyddion y Fenni ym 1848, ac a ymddangosodd flwyddyn wedyn fel *The Literature of the Kymry*. Hon oedd yr astudiaeth gyntaf o lenyddiaeth Cymru'r oesoedd canol a seiliwyd ar egwyddorion ysgolheigaidd modern, a chafodd dderbyniad tra ffafriol ledled Ewrop, gan ysgolheigion megis Matthew Arnold, Theodore Hersart de La Villemarqué, Henri Martin, Max Müller ac Albert Schulz. Fe'i hystyriwyd mor bwysig fel y'i cyfieithwyd i'r Almaeneg ym 1864. Serch hynny, ac er i Stephens barhau i fod yn ysgolhaig llwyddiannus, *Literature of the Kymry* fyddai'r unig gyfrol ysgolheigaidd o'i waith i ymddangos yn ystod ei fywyd. Enillodd ei draethawd pumcan tudalen ar 'Summary of the History of Wales from the earliest period to the present time' wobwr gyntaf Eisteddfod Rhuddlan, ond ni chafodd ei gyhoeddi oherwydd diffyg nawdd. Am yr un rheswm ni chyhoeddwyd ychwaith ei draethawd buddugol yn Eisteddfod olaf y Fenni, 1853, sef 'Remains of the Welsh Poets from the sixth century to the twelfth', a oedd i fod yn rhan gyntaf 'hanes cyflawn llenyddiaeth Gymraeg'. Ni chyhoeddwyd ei draethawd 'English prose translation of the "Gododdin" with explanatory notes' o 1853 tan 1888 fel *The Gododdin of Aneurin Gwawdrydd: An English Translation with Copious Explanatory Notes; A Life of Aneurin; and Several Lengthy Dissertations Illustrative of the 'Gododdin', and the Battle of Cattraeth*, wedi ei olygu gan **Thomas Powell** (1845-1922). Methodd gwaith mawr olaf Stephens, '**Madoc: an essay on the discovery of America by Madoc ap Owen Gwynedd in the twelfth century**', ag ennill cystadleuaeth Eisteddfod Llangollen 1858 am ei fod yn gwrthbrofi chwedl darganfyddiad America gan Madoc a'i ddilynwyr. Ystyriwyd Stephens yn ferthyr i wirionedd o ganlyniad, a chynnyddwyd drwg-enwogrwydd y prif feiriad a derwydd **John Williams** (ab Ithel). Cyhoeddwyd y traethawd olaf hwn ym 1893, wedi ei olygu gan gynydd a disgybl Stephens, **Llywarch Reynolds**.

Trodd Stephens at y wasg gylchgronol fel cyfrwng i fynegi ei syniadau beiriadol a'i ymchwil arloesol ar hanes y Cymry, a'i amcan o ddisodli rhamantiaeth â dull wyddonol o ymchwil yr un mor gadarn ag erioed. Ymhlith ei brif erthyglau y mae cyfres ar y ffugiwr rhamantus **Edward Williams** (lolo Morganwg) yn *Yr Ymfynydd* (1852-1853), ar y chwedlonol 'Dyfnwal Moelmu' a chyfreithiau cynnar y Cymry yn *Cambrian Journal* ac yna yn *Archaeologia Cambrensis* (1854 ymlaen), ar 'The Book of Aberpergwm' yn *Archaeologia Cambrensis* (1858), ac ar 'The Bardic Alphabet called "Coelbren y Beirdd"' yn *Archaeologia Cambrensis* (1872). Ceir nifer fawr o gyfraniadau byrrach ganddo mewn papurau newydd megis *The Cambrian*, *The Merthyr Guardian*, *The Monmouthshire Merlin*, ac *The Silurian*, ac mewn cylchgronau megis *Seren Gomer*, *Yr Ymfynydd*, *Y Traethydd* ac *Y Beirdd*.

Methodd ei iechyd yn dilyn sawl strôc, a bu farw ar 4 Ionawr 1875. Fe'i claddwyd yn rhan Anghydfurfiol mynwent Cefncoedycymer. Ar gais aelodau Capel Undodaidd Twynyrodin, Merthyr Tudful, cyhoeddwyd ei bregeth gynhebrwng, yn ogystal â'r rhestr o dros 180 o lyfrau ysgolheigaidd mewn nifer o ieithoedd a adawodd yn gymynrodd i lyfrgell Merthyr Tudful. Rhoddwyd ei archif i Lyfrgell Genedlaethol Cymru gan deulu ei weddw ym 1916, ble mae ar gael fel casgliad **LIGC Llsgrau. 904-66**. Yn 2017, rhoddwyd trawsysgrifiadau o'r prif gasgliad o lythrau at Thomas Stephens ar y we. Gellir eu chwilio ar: <https://archives.library.wales/index.php/letters-534> ac hefyd <https://archives.library.wales/index.php/letters-889>.

### Awdur

Marion Löffler

## Ffynonellau

- D. Jacob Davies, 'Thomas Stephens', *Y Bywgraffiadur Cymreig hyd 1940* (1953)
- Adam Coward, 'English Anglers, Welsh Salmon and Social Justice: The Politics of Conservation in Mid-Nineteenth Century Wales', *Cylchgrawn Hanes Cymru*, 27/4 (2015), 730-54
- Joe England, 'Unitarians, Freemasons, Chartists: The Middle Class in Victorian Merthyr', *Cylchgrawn Hanes Cymru*, 23/4 (2007), 35-58
- Mair Gregory, 'Cymdeithas Cymreigyddion y Fenni a'i Chynhyrchion pwysicaf, gyda sylw manylach i waith Thomas Stephens, Merthyr' (1949)
- Revel Guest & Angela V. John, *Lady Charlotte Guest. A Biography of the Nineteenth Century* (London 1989), tt. 180-3
- Gwernyfed, 'Mr. Thomas Stephens (1821-1875)', *Yr Ymfynydd*, cyfres newydd, rhifyn 90 (Mehefin, 1895), 121-6
- Marion Loffler, *The Literary and Historical legacy of Iolo Morganwg 1826-1926* (Cardiff 2007), tt. 130-50
- Marion Loffler (with Hywel Gethin Rhys), 'Thomas Stephens and the Abergavenny Cymreigyddion: Letters from the Cambrian 1842-3', *Cylchgrawn Llyfrgell Genedlaethol Cymru* (Mai 2009)
- Marion Loffler, 'Thomas Stephens a Llythyr Cyhoeddus yng Nghymru Oes Fictoria', *Y Traethodydd*, CLXV/692 (2010), 35-49
- Marion Loffler, 'Failed Founding Fathers and Abandoned Sources: Edward Williams, Thomas Stephens and the young J. E. Lloyd', in Neil Evans and Huw Pryce (eds.), *Writing a Small Nation's Past: Wales in Comparative Perspective, 1850-1950* (Farnham 2013), tt. 67-81
- D. Rhys Phillips, *The History of the Vale of Neath* (Swansea 1925)
- Brynley F. Roberts, 'Welsh Scholarship in Merthyr Tydfil', *Merthyr Historian*, X (1999), tt. 51-62
- Margaret Stewart Taylor, 'Thomas Stephens of Merthyr (1821-1875)', *Merthyr Historian*, II (1978), tt. 135-41
- Mair Elvet Thomas, *Afiaith yng Ngwent: Hanes Cymdeithas Cymreigyddion y Fenni* (Caerdydd 1978)
- Mair Elvet Thomas, *The Welsh Spirit of Gwent* (Cardiff 1988)
- Havard Walters, 'The Literature of the Kymry', *Llŷn Cymru*, X (1969), 231-40
- Charles Wilkins, 'Men Whom I have Known: Thomas Stephens', *Cymru Fu* (9 November 1889), 71-4
- Charles Wilkins, *The history of Merthyr Tydfil* (Merthyr Tydfil 1867), tt. 258-60
- B. T. Williams, 'The Life of Thomas Stephens', in D. Silvan Evans (ed.), *The literature of the Kymry being a critical essay on the history of the language and literature of Wales* (London 1876), tt. xix-xlviii
- N. R. Williams, *A Funeral Sermon on the Late Thomas Stephens, Esq., (Author of the Literature of the Kymry) delivered at the Unitarian Chapel, Merthyr Tydfil, On Sunday Evening, January 17, 1875*
- Yr Ymfynydd* 'Thomas Stephens o Ferthyr' [rhifyn coffa], Cyf. XLIX, Rhifyn 8 (Awst, 1949)

## Darllen Pellach

- Adam Coward, 'Would You Kindly Direct Me to a Better Translation': Languages in the Correspondence of Thomas Stephens (1821-1875)
- Adam Coward, *Controversy, Cooperation, and Revolutionary Scholarship: The Correspondence of Thomas Stephens (1821-1875)*
- Adam N. Coward (gol.), *The Correspondence of Thomas Stephens: Revolutionising Welsh Scholarship in the Mid-Nineteenth Century Through Knowledge Exchange* (Aberystwyth 2020)
- Charles Wilkins, *Notable Men of Wales: Thomas Stephens* (Cardiff 1882)
- Erthygl Wicipedia: Thomas Stephens

## Dolenni Ychwanegol

Archifau LIGC: Thomas Stephens Manuscripts

VIAF: 100262427

Wikidata: Q3400718

**Dyddiad cyhoeddi:** 2017-08-07

**Hawlfraint Erthygl:** <https://creativecommons.org/licenses/by-sa/4.0/>

Erthygl a archifwyd

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfeyrdiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



Arddull APA



Löffler, M., (2017). STEPHENS, THOMAS (Casnodyn, Gwrmerth, Caradawg; 1821-1875), hanesydd a diwygiwr cymdeithasol. *Y Bywgraffiadur Cymreig*. Adferwyd 4 Hyd 2024, o <https://bywgraffiadur.cymru/article/c11-STEP-THO-1821>

CC BY-SA

Preifatrwydd a Chwcis  
Hawlfraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Ysgrifeddiadau  
Llywodraeth Cymru  
Copied by  
Welsh Government